

МЕД УНДЖЫКЫСЬ НА АДЗЫСЬЛАСНЫ



Неважён Кörtкерöс районысь Висер сиктса библиотекаын вöли нималана гижысьяс Иван Белыхкöд да Николай Щукинкöд адззысьлöм. А тöдмасын гижысьяскöд да ас йывсьыныс висьтасыны волісны сиктса олöма анясьлөн «Кудесница» котырын зільысьяс.

Ёна виччысьöмаось Висерад гижысьястö. А кытысь сэсся небöг да снимок вылысь кындзи найöс адззылан? Пызан сайын пукалігөн ёрта-ёрткöд сёрнитігмоз и муніс адззысьлöмыс. Медводз Николай Александрович ас йывсьыс висьтасис. Чужлöма сійö Емдін районса Лыаты грездын, буретш таво августын 80 арöс тырöма. Война заводитчигөн пырöма босьтны тöдöмлун школаö, бöрынджык нин Гöрд Затонын пароходса механикö велöдчöма. Уджавлöма радиоын корреспондентöн, буретш сэки и волöма Висерö, вель поскыс на весиг абу вöлöма.

Олöма анясьлы Николай Александрович лыддис асьыс кывбурьясö да тшöтш и сыланкыв ливкйöдліс.

Иван Ильич тшöтш окотапырысь висьтасис ас йывсьыс. Ёна сылөн гажыс бырö чужан Паль сиктсьыс, весиг пö синваöй петö сійöс казтылігөн. Коми пединститут помалöм бöрын Иван Ильич пыр зліс газетын корреспондентöн, но ас кадö тшöтш и Коми небöг лэдзанын уджавліс. Öнöдз на гижö уна сикас казтылöм «Коми муö» да челядьлы висьтъяс том йöзлөн «Йöлöга» газетö. Гижöдыс тырмö быдса небöгъяс лэдзöм вылö.

Сюся кывзисны Висерса аняяс гижысьясöс, юасисны, öтув казтылісны кольöм воясö. А тшöтш и ас йывсьыныс висьтасисны.

Налөн «Кудесница» котырыслы нель во нин лö. Öтчыд вежоннас аняяс чукöртчылöны сиктса библиотекаö. Варовитігмоз кысьöны — быдсяма мичыс налөн ки помысь артмö. Тшöтш и сідз шусяна модульнöй оригами дасьтöны. А отсасьöны налы да быдсяма гаж котырлöны библиотекаса уджалысь Светлана Владимировна Игушева да велöдысь Оксана Васильевна Пинягина. Найö жö корлöмаось Зулöб грездысь зарни киа ань Нина Станиславовна Макароваöс мастер-класс нудны. Бабушьяс велöдчöмаось брошка да видзöг ас киөн вöчавны. Школаын спорт ордйысьöмьяс дырйи аняяс чöскыд пöжасөн да пöсь тшайөн номсöдлöны ныв-зонмöс. А Оксана Васильевналөн ышöдöмөн тöвнас тшöтш и асьныс лызь вылö сувтлöны.

Висерса «кудесница» ёртасьöны тшöтш и Пезмöг сиктса олöма аняяс-кöд. Неважөн ветлöмаось на ордö гöститны, а сэсся асьныс пезмöгса волöмаось. Ёна кажитчöма налы Висерад.

Со тадзи и коллялöны прöст каднысö Висерса аняяс. Оз тай шогсьыны визув ёль моз визувтывсь кольöм кадысь, пыр мыйкö выльтор зільöны вöчны, адзöны кад и гажöдчыны. Кольöм во со татшöм сикас адззысьлöмыс вöлі кывбуралысь Анжелика Елфимовакöд, а таво со уси шуд öти пызын сайын пукавны Иван Белыхкöд да Николай Щукинкöд.

Кыз шуласны, Ен отсöгөн, мед и водзö унджык на лöб татшöм рытыс.

Аняяс нöббисны гижысьяслысь вель небöгъяс, а Иван Ильич да Николай Александрович став бурсö сиöмөн кырымалісны асьыныс «пöжаснысö». Висерса корисны гижысьясöс нöшта волыны, а медбöрын ставөн öтув снимайтчисны «на память».

Сиам олöма йöзлы крепыд дзоньвидзалун, кузь нэм да бур шуд. Водзö вылö татшöм ногөн жö зільöй да водзмöстчöй. Энö видзöдöй кольöм вояс вылö, а нимкодьясöй да радлöй талунья луныслы.

Галина МАКАРОВА.

Снимокыс Екатерина МИКУШЕВАЛÖН.